

TEZAUUR LITURGIC


2 OCTOMBRIE

**ACATISTUL
SF. IERARH-MUCENIC
CIPRIAN,
EPISCOPUL ANTIOHIEI PISIDIEI**

**SF. MUCENIȚE
IUSTINA
DE LA ANTIOHIA PISIDIEI**



MOSCOVA, 2000



Акафист

священномученику Киприану и святой мученице Иустине

Кондак 1

Избранныи чудотворцы и скории заступницы,
священномучениче Киприане и мученице
Иустино, яко имущии велие дерзновение ко
Господу и выну Престолу Его предстоящи,
предстательством вашим от всяких нас бед
свободите и наследники Царствия Небеснаго
соделайте, похвальное пение вам приносящих:
Радуйтесь, Киприане и Иустино, скории
помощницы и молитвенницы о душах наших.

Икос 1

Ангельския силы удивишася, како вы, Киприане
и Иустино, от бездушных богов отвратившеся и
в Бога Жива уверовавше, познанием истины
Божественныя обрели есте ангельское
безстрастное житие. Мы же, сему дивящеся,
вопием вам таковая:

Радуйтесь, твердостью вашей веры во Христа
Ангелы удивившии.

Радуйтесь, вхождением на брак Агнчий лик святых возвеселившии.

Радуйтесь, яко за Христа мужественно пострадали есте.

Радуйстєя, яко за исповедание Его венцы нетленнии прияли есте.

Радуйтесь, на небесех ныне пред Престолом Божиим предстоящи.

Радуйтесь, о спасении душ наших Господа умоляющи.

Радуйтесь, Киприане и Иустино, скории помощницы и молитвеницы о душах наших.

Кондак 2

Видя суету идольскаго нечестия, к познанию Божественному от художества волшебнаго отвратился еси, Киприане, душу свою от погибели вечныя исхищая. Ныне же, у Престола Божия во славе небесней предстоя, молися Человеколюбцу Владыце спасти души наша, поющих Ему: Аллилуиа.

Икос 2

Разумом истиннаго богопознания свыше наставляемый, чародейства и волхвования

отвратился еси, Киприане, и слезным покаянием страсти своя угасил еси; уведев же, яко имене Христова и Креста Животворящаго бесы трепещут и козни вражия разрушаются, в храм Божий на служение Ему притекл еси. Темже, усердие твое похваляюще, взываем сице:

Радуйся, хитрости демонския мужественно отвергнувый.

Радуйся, козни их пагубныя яко паучину растерзавый.

Радуйся, прелести служения его небоязненно обличивый.

Радуйся, змия лукаваго пред всеми посрамивый.

Радуйся, яко тобою бесы отгоняются.

Радуйся, яко тобою болезни телесныя и душевныя исцеляются.

Радуйтесь, Киприане и Иустино, скории помощницы и молитвеницы о душах наших.

Кондак 3

Силою Вышняго укрепляема, семена веры спасительныя в сердце своем восприяла еси, Иустино: ты бо проповеди диакона Праилия о Господе Иисусе Христе, рождшемся от

Пречистыя Девы Марии, страдавшем, и погребенном, и разрушившим смертью смерть, внимая, добрый плод в души своей возрастила еси, терния неверия искореняя, и Богу вопия: Аллилуиа.

Икос 3

Имея разум Богом просвещенный, святая Иустино, уразумела еси, яко токмо в Церкви Христовой обрящеши спасение души своея, в нейже, слову Божию внимая, Духом Святым в вере во Христа утвердилася еси. Таковому Божию благоволению о тебе радуясь, воспеваем ти сице:

Радуйся, звездо, во тьме языческаго нечестия возсиявшая.

Радуйся, светом благочестивыя веры просветившаяся.

Радуйся, благодатию Духа Святаго душу твою исполнившая.

Радуйся, Жениху Небесному девство свое обручившая.

Радуйся, Сладчайшаго Иисуса невесто прекрасная.

Радуйся, великою во Царствии Небеснем нареченная.

Радуйтесь, Киприане и Иустино, скории помощницы и молитвеницы о душах наших.

Кондак 4

Бури греховныя избегая, ко Христу пришел еси и всего себе, яко жертву благовонную, Спасителю нашему принесл еси, богомудре Киприане, твердое бо намерение в сердце своем приял еси: Крещением святым душу свою убелити, верным последователем Господу быти и во вся дни живота своего воспевати Ему: Аллилуиа.

Икос 4

Слышаще отречение твое от служения врагу рода человеческого и видяще благое намерение твое во Христа облещися и совершенным христианином быти, епископ Анфим абие крести тя, Киприане, и чтецом во храме Божием постави. Мы же, радуящиеся таковому твоему обращению ко Христу, поем ти таковая:

Радуйся, яко Господа всею душою возлюбил еси.

Радуйся, яко христианином истинным быти возжелел еси.

Радуйся, святое Крещение с благоговением
приявый.

Радуйся, Духа Святаго жилище себе сотворивый.

Радуйся, Господом свыше просвещенный.

Радуйся, епископом в вере Христовой
наставленный.

Радуйтесь, Киприане и Иустино, скории
помощницы и молитвеницы о душах наших.

Кондак 5

Боготечною стезею устремилася еси и тихаго
пристанища достигла еси, святая мученице
Иустино: ты бо светом истины Божественныя
родители твоя Едесия и Клеодонию
просветивши, купно с ними святое Крещение от
епископа Онтата прияла еси, да Христу угодна
будеши и возможеши невозбранно пети Ему:
Аллилуиа.

Икос 5

Видяще премногую добродетель отца твоего
Едесия, постави его святитель Божий во
пресвитера, да добродетельным житием и иных
ко Христу приведет; тебе же, достоблаженная
Иустино, достойную дочь его, паче всего

Христа возлюбившую и в соблюдении заповедей Его добре подвизавшуюся, почитаем звании сими:

Радуйся, красотою душевною просиявшая.

Радуйся, девство непорочное в дар Богу принесшая.

Радуйся, благовестнице Евангелия богомудрая.

Радуйся, заповедей Господних проповеднице усердная.

Радуйся, подвижнице Божия, постом и молитвою воспитанная.

Радуйся, голубица непорочная, кротости и незлобия преисполненная.

Радуйтесь, Киприане и Иустино, скории помощницы и молитвенницы о душах наших.

Кондак 6

Проповедник истины Христовы явился еси, священномучениче Киприане, темже Человеколюбец Господь, Иже хотяй всем спастися, дарова нам тебе дивнаго молитвенника, целителя и защитника от духов злобы поднебесных: ты бо дела и словеса твоими приводиши многия к покаянию и

греховныя жизни исправлению, научая всех пети Богу: Аллилуиа.

Икос 6

Возсиял еси, яко светило светозарное, просвещающее светом богопознания всех, во тьме неверия сущих, святителю Киприане, понеже молитве твоей никияже чародеяния, от лукавых бесов и злых человек исходящая, противостати не могут: обаче силою Божиею разрушаются и прогоняются. Сего ради вопием сице:

Радуйся, вражиих козней разрушителю.

Радуйся, злых бесов прогонителю.

Радуйся, от враг видимых и невидимых стено и ограждение.

Радуйся, оставленных врачами предивное поможение.

Радуйся, от бед и скорбей скоро избавляй.

Радуйся, страдания в радость претворяй.

Радуйтесь, Киприане и Иустино, скории помощницы и молитвеницы о душах наших.

Кондак 7

Хотящи мудрым евангельским девам
поревновати, елеем добрых дел исполнилася еси,
славная мученице Иустино, и, возжегши
свотильник души своея, просвещала еси люди
Христовым учением, да познавше Господа
Иисуса поют Ему: Аллилуиа.

Икос 7

Новую показа на тебе милость Свою Всемогуций
Господь: Божественною бо благодатию Своею
вознесе тя, преславная Иустино, на высоту
духовнаго совершенства, яко и немощныя от
недугов душевных и телесных исцеляти, и от
духов нечистых страждущия от козней их
лукавых свободдати возможеша. Сего ради
вопием ти:

Радуйся, горняя, паче дольних, возлюбившая.

Радуйся, Богу всю себе предавшая.

Радуйся, серафимскою любовию к Нему
горящая.

Радуйся, и нас любити Его всею душою
научающая.

Радуйся, людей православных в вере
утверждение.

Радуйся, девственного сонма украшение.

Радуйтесь, Киприане и Иустино, скории
помощницы и молитвенницы о душах наших.

Кондак 8

Странно бе нечестивому игемону видети тебе,
священномучениче Киприане, егда суду
неправедному тебе предаде: ты бо, яко
непоколебим воин Царя Небеснаго, со
дерзновением Христа исповедал еси, во
страданиях воспевая: Аллилуиа.

Икос 8

Всего себе Богу предал еси, священномучениче
Киприане: не убоялся бо еси прещений лютых и
самых страданий, обаче лицом светлым,
благодатию Божиею сияющим, предстал еси
судилищу нечестивому, подвизая всех верных
воспевати ти сице:

Радуйся, веры Христовы непоколебимый
исповедниче.

Радуйся, Пречистыя Троицы дерзновенный
проповедниче.

Радуйся, силою Божиею духов злобы победивый.

Радуйся, огнем молитвы стрелы вражия попаливый.

Радуйся, яко мучения лютая ни во чтоже вменил еси.

Радуйся, яко в страданиях твоих Бога прославил еси.

Радуйтесь, Киприане и Иустино, скории помощницы и молитвеницы о душах наших.

Кондак 9

Всякое благое прошение наше, притекающих к тебе с верою, не отрини, мученице святая Иустино, ибо данною тебе от Бога благодатию изгоняти духи нечистыя, мучащия человека, бесы прогоняются и недужным здравие подается, вопиющим Богу: Аллилуиа.

Икос 9

Ветии многовещаннии по достоянию не возмогут воспети вся труды твоя, святая Иустино, ты бо всем сердцем и всею душею Бога возлюбивши, все твое тщание и желание направляла еси, во еже святую волю Его исполняти. Темже и ныне нас, бедами и

скорбьми отягченных, не оставляеши, но предстательствуеши за ны пред Господем, исцелении и утешение нам даруя. Сего ради, восхваляя тя, взываем сице:

Радуйся, во благих прошения наша скоро исполняющая.

Радуйся, в недугех страждущия благодатно посещающая.

Радуйся, в молитвах наших теплое прибежище.

Радуйся, обидимым благое утешение.

Радуйся, верных ко спасению добрая наставнице.

Радуйся, в борениях сущим помощнице.

Радуйтесь, Киприане и Иустино, скории помощницы и молитвенницы о душах наших.

Кондак 10

Спасение всех устрояющи Человеколюбец Господь, по скончании исповедническаго подвига твоего, увенча тя, святителю Киприане, венцем мученическим: исповедуя бо пред мучители Бога Истинна, в Троице Святей покланяемаго, небоязненно подклонил еси под меч главу свою, воспевая: Аллилуиа.

Икос 10

Стена еси и щит, богомудре Киприане, всем усердно к тебе прибегающим и пред иконою твоею тепле молящимся: тебе бо дарова нам Всеблагий Господь в помощь и врачевство болезней душевных и телесных. Сего ради взываем ти:

Радуйся, яко Господу за нас молитвы своя возносиши.

Радуйся, яко пред Престолом Божиим о нас ходатайствуеши.

Радуйся, яко светом боговедения праведныя просвещаеши.

Радуйся, яко заблуждших на путь спасительный наставляеши.

Радуйся, дары целебныя просящим у тебе скоро подавая.

Радуйся, любящим и чтущим тя любовью сугубою воздавая.

Радуйтесь, Киприане и Иустино, скории помощницы и молитвеницы о душах наших.

Кондак 11

Пение всеумиленное ко Господу возносила еси, страстотерпице святая Иустино, егда мучения тяжкия мужественно за Него терпела еси; течение же твое исповедническое скончавши, радостно главу свою на вечное усечение преклонила еси, воспевая Богу: Аллилуиа.

Икос 11

Светозарною свещею на свещнице церковней сияеши, святая Иустино, светом благодатным отгоняющи от нас врагов видимых и невидимых. Мы же, с теплою верою и любовью к тебе прибегающи, восхваляем мученическую кончину твою, взывая сице:

Радуйся, Бога Истинного дерзновенно проповедавшая.

Радуйся, о укрепляющем тя Господе вся возмогшая.

Радуйся, яко язвы Господа Иисуса на теле твоём носила еси.

Радуйся, яко терпением твоим мучителей победила еси.

Радуйся, мученическое течение твое мечною кончиною увенчавшая.

Радуйся, Господа твоего страданиями и чудесы прославившая.

Радуйтесь, Киприане и Иустино, скории помощницы и молитвенницы о душах наших.

Кондак 12

Благодать дана вам от Бога, святии Киприане и Иустино, попирати силу вражию и всякое бесовское нахождение: вы бо страдания велия претерпевши, мученическою кончиною своею блаженства вечнаго достигли есте; ныне же предстоя Престолу Царя славы, молитесь о нас, во еже избавитися нам от пленения диавольскаго, да возможем непреткновенно пети Богу: Аллилуиа.

Икос 12

Поюще ревность вашу по Бозе и дивная и преславная чудеса ваша, величаем и восхваляем вас, священномучениче Киприане и мученице Иустино, таковую благодать от Бога приемших; молим же вас: егда в час смерти нашея демонския полчища обстоят души наша, тогда явите нам свое заступление, да присно вами избавляеми, взываем сице:

Радуйтесь, от находящих козней вражиих
скорое защищение.

Радуйтесь, от скорбей и печалей избавление.

Радуйтесь, Христа до конца возлюбивший.

Радуйтесь, души своя за Него положивший.

Радуйтесь, в Крови Агнчей омывшийся.

Радуйтесь, во дворех Господних вселившийся.

Радуйтесь, к сонму святых сопричтении.

Радуйтесь, Трисиянным Светом озарении.

Радуйтесь, Киприане и Иустино, скории
помощницы и молитвенницы о душах наших.

Кондак 13

О предивнии и преславнии угодницы Божии,
священномучениче Киприане и мученице
Иустино, скории помощницы всем с верою к
вам прибегающим, примите от нас,
недостойных, хвалебное пение сие, и от недугов
душевных и телесных вся ны исцелите, от враг
видимых и невидимых заступите и вечнаго
мучения избавитися нам Господа умолите, да
купно с вами вопием: Аллилуиа.

(Этот кондак читается трижды)